

# PREDIS ZOVINS CJARGNEI PES MISSIONS IN AFRICHE

Un che nol sa disberdeâ i siei gredeis in cjase sô, nol à di vê la pratese di žovâ a di cheâtris. A sares presunsion e stupiditât. Cheste la morâl de storiute ...

Il prin problema dai Africans al è chel di viodisi rispjetade la lor culture, la lor origjnalitât, il dirit di cressi, di guviernâsi bessei. Chest si pratindress ch'a lu capissin amancul chêi ch'a san che « l'omp nol vîf dome di pan ... ». Ma cheste robe puedie lâ a contâle une glesie ch'a no jè stade buine di risolvi il problema a cjase sô?

Ce larêso a contâ ai neris: « voleisi ben come fradis? » Stait atenz che j neris a son inteligjenz: a us podaressin domandâ cemût ch'o veis disfate la cuistion in cjase vueste! E alore, varessiso il coragjo di contâjur lis vuestris trainis, lis aleancis cui granc' a damp de biade int? E varêso l'onestât di spiâjur ch'a 'e nestre int j cjacarais tune lenghe che nissun di lôr nol dopre, dome vuâtris, insieme cul miedi, j garbenîrs e cheâtris parons dal vapôr? Larêso a puartâjur la « veretât »? Ma, e la storie, lis strusiis, la distrusion metodiche di chest popul che nol à nancje il dirit di clamâsi cul so non e di jessi in cjase a cjase sô, esal un âtri stamp di veretât? Masse comut: doi stamps, dôs misuris. O predicjais un Diu - veretât, ma puar mai Lui s'al ven a cucâ sot dai nûi!

Par dut chest us disìn: mostrait achì che Diu al è Veretât e no stait a confondile cu la culture uficiâl; mostrait ch'al è Pari di duc', no dome di cualchidun che al crôt dopo, cul vuestri apogjo, di vê il dirit di meti il pît sul cuel a di cheâtris.

J Apuestui a lavin a contâ atôr pal mont j spetacui (« magnalia ») che Diu al veve fat in lôr: cemût che ur veve ganbiât il cjâf, cemût che ju socave a no stâ sitos nancje denant dai caporions plui pelôs di cûr.

E vuâtris, ce provis puartarêso de grinte dal vuestri Diu?

Poben, cuant che nus varês dit che Crist a nus libere ancje nô, cun cheste mûse, cu la nestre storie, alore ancje nô us disarìn ce ch'o podaressin lâ a fâ in Afriche. Par cumò il nestri parê al è chest: STAIT A CJASE, no stait a lâ a umiliâ, magari in non dai Furlans, âtris popui žà umiliâz come nô!

Stait a cjase, parceche nus sa che chest mût di meti sù missions al pandi une profonde debolece: dato che la vitalitât di une glesie a jè provade midiant de missionarietât, laiso in Afriche par chest? Ma bastial lâ atôr cul casselot par jessi come san Pauli? No si puess, par une sen personâl, doprâ âtris personis: a son fîs di Diu!

E o sierin il sprolocui pensant che o vebis capît che chest lu disîn dome pe stime ch'o vin pai africans e pes missions.

Al saress tant biel lâ a contâ pal mont ce che Diu al à fat par mieç nestri, a cjase nestre, « in propria » a' e nestre int. Ma se no vin il coragjo di lassâ-lu fâ, tocje dî ch'a no je ancjemò l'ore!

\* \* \*

Il vescul Pieri, di Gurisse, al domande une man al nestri Alfredo par lâ a convertî 80.000 neris 'e periferie di Bouaké, trisc' come la peste boboniche, « animisti e mussulmani », ch'a no vuelin convertîsi nancje se si ur dâ jù cul maçûl.

Cheste a jè la nestre rispueste: une rispueste ch'a nus semée oneste. Cundut il rispiet par chêi biâz Missionaris ch'a son stâz faz fûr dai neris, o sin sigûrs che in Paradîs no cjatarin dome i Missionaris, ma ancje chêi ch'a ju an mangjâz, e forsit ancje il cogo! In fond, a cirivin di difindi il lor dîrit di jessi come che Diu ju veve faz.